

先賢傳下

河內縣志卷第二十六

金

張邦直字子忠河內人少工詞賦嘗魁進士平陽南渡爲國史院編修官遷應奉翰林文字在館五六年從趙閒閒遊性朴澹好學敬善謙甚士多愛之閒閒本注太元子忠嘗言親授於關中隱士薛子明因相與講辨甚久俄丁母艱出館居南京從學者甚衆束修唯以市書惡衣糲食雖仕官如貧士也同年如雷宋諸人皆以聲名意氣相豪子忠獨恬退以學自樂正大初余先子入翰林子忠從之遊先子歿與余善從南京被圍闕食余遇之富城西敝衣縑縷可憐已而聞鬻卜天街值一回鶻問卜子忠以文語應之爲回鶻所毆北渡將

河內縣志

先賢傳下
卷二十六

一

還鄉道病死哀哉

劉祁歸潛志

元

許衡字仲平懷之河內人也世爲農父通避地河南以泰和九年九月生衡於新鄭縣幼有異質七歲入學授章句問其師曰讀書何爲師曰取科第耳曰如斯而已乎師大奇之每授書又能問其旨義久之師謂其父母曰兒穎悟不凡他日必有大過人者吾非其師也遂辭去父母強之不能止如是者凡更三師稍長嗜學如饑渴然遭世亂 貧無書嘗從日者家見書疏義因請寓宿手抄歸旣逃難岨嶮山始得易王輔嗣說時兵亂中衡夜思晝誦身體而力踐之言動必揆諸義而後發嘗暑中過河陽渴甚道有梨衆爭取啖之衡獨危

坐樹下自若或問之曰非其有而取之不可也人曰世亂此無主曰梨無主吾心獨無主乎轉魯留魏人見其有德稍稍從之居三年聞亂且定乃還懷徃來河洛間從柳城姚樞得伊洛程氏及新安朱氏書益大有得尋居蘇門與樞及竇默相講習九經傳子史禮樂名物星歷兵刑食貨水利之類無所不講而慨然以道爲己任嘗語人曰綱常不可一日而亡於天下苟在上者無以任之則在下之任也凡喪祭娶嫁必徵於禮以倡其鄉人學者寢盛家貧躬耕粟熟則食粟不熟則食糠覈菜茹處之泰然謳誦之聲聞戶外如金石財有餘卽以分諸族人及諸生之貧者人有所遺一毫弗義弗受也樞嘗被召入京師以其雪齋居衡命守者館之衡拒不受庭

河內縣志

先賢傳下
卷二十六

一一

有果熟爛墮地童子過之亦不睨視而去其家人化之如此甲寅世祖出王秦中以姚樞爲勸農使教民畊植又思所以化秦人乃召衡爲京兆提學秦人新脫於兵欲學無師聞衡來人人莫不喜幸來學郡縣皆建學校民大化之世祖南行乃還懷學者攀留之不得從送之臨潼而歸中統元年世祖卽皇帝位召至京師時王文統以言利進爲平章政事衡樞輩入侍言治亂休戚必以義爲宗文統患之且竇默曰於帝前排其學術疑衡與之爲表裏乃奏以樞爲太子太師默爲太子太傅衡爲太子太保陽爲尊用之實不使數侍上也默以屢攻文統不中欲因東宮以避禍與樞拜命將入謝衡曰此不安於義也姑勿論禮師傅與太子位東西鄉師傅坐太

子乃坐公等度能復此乎不能則師道自我廢也樞以爲然乃相與懷制立殿下五辭乃免改命樞大司農默翰林侍講學士衡國子祭酒未幾衡亦謝病歸至元二年帝以安童爲右丞相欲衡輔之復召至京師命議事中書省衡乃上疏曰臣性識愚陋學術荒疎不意虛各偶塵聖聽陛下好賢樂善舍短取長雖以臣之不才自丙寅至今十有三年九入被詔旨中懷自念何以報塞又日者面奉德音丁寧懇至中書大務容臣盡言臣雖昏愚荷陛下知待如此其厚敢不罄竭所有裨益萬分孟子以責難於君謂之恭陳善閉邪謂之敬孔子謂以道事君不可則止臣之所守大意蓋如此也伏望陛下寬其不佞察其至懷則區區之愚亦或有小補云其一曰

河內縣志

先賢傳下
卷二十六

三

自古立國皆有規模循而行之則治功可期否則心疑目眩變易分更未見其可也昔子產相衰周之列國孔明治西蜀之一隅且有定論終身由之而堂堂天下可無一定之說而妄爲之哉考之前代北方之有中夏者必有漢法乃可長久故後魏遼金歷年最多他不能者皆亂亡相繼史冊具載昭然可考使國家而居朔漠則無事論此也今日之治非此奚宜夫陸行宜車水行宜舟反之則不能行幽燕食寒蜀漢食熱反之則必有變以是論之國家之當行漢法無疑也然萬世國俗累朝勳舊一旦驅之下從臣僕之謀改就亡國之俗其勢有甚難者切嘗思之寒之與暑固爲不同然寒之變暑也始於微溫溫而熱熱而暑積百有八十二日而寒始盡暑

之變寒其勢亦是亦積之之驗也苟能漸之摩之待以歲月心堅而確事易而常未有不可變者此在陛下尊信而堅守之不雜小人不責近效不恤流言則致治之功庶幾可成矣二曰中書之務不勝其煩然其大要在用人立法二者而已矣近而譬之髮之在首不以手理而以櫛理食之在器不以手取而以匕取手雖不能而用櫛與匕卽手之爲也上之用人何以異此然人之賢否未知其詳固不可得而遽用也然或已知其孰爲君子孰爲小人而復患得患失莫敢進退徒曰知人而實不能用人亦何益哉人莫不飲食也獨膳夫爲能調五味之和莫不睹日月也獨星官爲能步虧食之數者誠以得其法故也古人有言曰爲高必因邱陵爲下必因

河內縣志

先賢傳下
卷二十六

四

川澤爲政必因先王之道今里巷之談動以古爲詬戲不知今日口之所食身之所衣皆古人遺法而不可違者豈天下之大國家之重而古之成法反可違邪其亦弗思甚矣夫治人者法也守法者人也人法相維上安下順而宰執優游於廊廟之上不煩不勞此所謂省也夫立法用人今雖未能遽如古昔然已仕者當給俸以養其廉未仕者當寬立條格俾就叙用則失職之怨少可舒矣外設監司以察污濫內專吏部以定資歷則非分之求漸可息矣再任三廷抑高舉下則人才爵位略可平矣至於貴家之世襲品官之任子版籍之數續當議之亦不可緩也其三曰民生有欲無主乃亂上天眷命作之君師此蓋以至難任之非予之可安之地而娛之

也是以堯舜以來聖帝明王莫不兢兢業業小心畏慎者誠知天之所畀至難之任初不可以易心處之也知其爲難而以難處則難或可爲不知爲難而以易處則他日之難有不可爲者矣孔子曰爲君難爲臣不易爲臣之道臣已告之安童矣至爲君之難又陛下之所當專意也臣請言其切而要者夫人君不患出言之難而患踐言之難知踐言之難則其出言不容不慎矣昔劉安世行一不妄語七年而後成夫安世一士人也所交者一家之親一鄉之衆也同列之臣不過數十百人而止耳而言猶若此況天下之大兆民之衆事有萬變日有萬機人君以一身一心而酬酢之欲言之無失豈易能哉故有昔之所言而今日忘之者今之所命而後日自

河內縣志

先賢傳下
卷二十六

五

違者可否異同紛更變易紀綱不得布法度不得立臣下無所持循奸人因以爲弊天下之人疑惑驚眩且議其無法無信一至於此也此無他至難之地不以難處而以易處故也苟從大學之道以脩身爲本凡一言一動必求其然與其所當然不牽於愛不蔽於憎不因於喜不激於怒虛心端意熟思而審處之雖有不中者蓋鮮矣奈何爲人上者多樂舒肆爲人臣者多事容悅容悅本爲私也私心盛則不畏人矣舒肆本爲欲也欲心盛則不畏天矣以不畏天之心與不畏人之心感合無間則其所務者皆快心事耳快心則口欲言而言身欲動而動又安肯兢兢業業以脩身爲本一言一動熟思而審處之乎此人君踐言之難而又難於天下之人也人

之情僞有易有險險者難知易者易知此特係夫人之險易者然也然又有衆寡之分焉寡則易知衆則難知故在上者難於知下而在下者易於知上其勢然也處難知之地御難知之人欲其不見欺也難矣昔包拯剛嚴峭直號爲明察然一小吏而能欺之然拯一京尹耳其見欺於人不過誤一事害一人而已人君處億兆之上操予奪進退賞罰生殺之權不幸見欺則以非爲是以是爲非其害有不可勝旣也人君惟無喜怒也有喜怒則贊其喜以市恩鼓其怒以張勢人君惟無愛憎也有愛憎則歡其愛以濟私藉其憎以復怨甚至本無喜也誑之使喜本無怒也激之使怒本不足愛也而誑譽之使愛本無可憎也而強短之使憎若是則進者未必爲

河內縣志

先賢傳下
卷二十六

六

君子退者未必爲小人予者未必爲有功奪者未必爲有罪以至賞之罰之生之殺之鮮有得其正者人君不悟其受欺也而反任之以防天下之欺欺而至此尙可防邪大抵人君以知人爲貴以用人爲急用得其人則無事於防矣旣不出此則所進者爭進之人耳好利之人耳無恥之人耳彼挾其詐術千蹊萬徑以蠱君心欲防其欺雖堯舜不能也夫賢者以公爲心以愛爲心不爲利回不爲勢屈實之周行則庶事得其正天下被其澤其於人國重固如此也夫賢者遭時不偶務自韜晦世固未易知也雖或知之而無所援引則人君無由知也人君知之然召之命之況如廝養賢者有不屑也雖或接之以貌待之以禮然而言不見用賢者不處也或用

其言也而復使小人叅之責小利期近效有用賢之名無用賢之實賢者亦豈肯尸位素餐以取譏於天下哉此特難進者也而又有難合者焉人君處崇高之地大抵樂聞人過而不樂於聞已之過務快已之心而不務快民之心賢者必欲匡而正之扶而安之如堯舜之正堯舜之安而後已故其勢恒難合況夫奸邪佞倖醜正而惡直肆爲詆毀多方以陷之將見罪戾之不免又可望其庶事得其正而天下被其澤邪自古及今端人雅士所以重於進而輕於退者蓋以此耳大禹聖人聞善卽拜益猶戒之以任賢勿貳去邪勿疑後世人主宜如何也此任賢之難也奸邪之人其爲心也險其用術也巧惟險也故千態萬狀而人莫能知惟巧也故千蹊萬徑

河內縣志

先賢傳下
卷二十六

七

而人莫能禦其諂似恭其訐似直其欺似可信其佞似可近務以窺人君之喜怒而迎合之竊其勢以立已之威濟其欲以結主之愛愛隆於上威擅於下大臣不敢議近親不敢言毒被天下而上莫之知至是而求去之亦已難矣雖然此特人主之不悟者也猶有說焉如宇文士及之佞太宗灼見其情而不能斥李林甫妬賢嫉能明皇洞見其奸而不能退邪之惑人有如此者可不畏哉夫上以誠愛下則下以忠報上感應之理然也然考之往昔有不可以常情論者禹抑洪水以救民啟又能敬承繼禹之道其澤深矣然一傳而太康失道則萬姓仇怨而去者何邪漢高帝起布衣天下影從滎陽之難紀信至捐生以赴急則人心之歸可見矣及天下已定

而沙 有謀反者又何邪竊嘗思之民之戴君本於天命初無不順之心特由使之失望使之不平然後怨怒生焉禹啟愛民如赤子而太康逸豫以滅德是以失望漢高以寬仁得天下及其已定乃以愛憎行誅賞是以不平古今人君凡有恩澤於民而民怨且怒者皆類此也夫人君有位之初既出美言而告天下矣既而實不能副故怨生焉等人臣耳無大相遠人君特以己之私而厚一人則其薄者已疾之矣況於薄有功而厚有罪人得不怒於心邪必如古者大學之道以脩身爲本一言一動舉可以爲天下之法一賞一罰舉可以合天下之公則億兆之心將不求而自得又豈有失望不平之累哉三代而下稱盛治者無如漢之文景然考之當時天

河內縣志

先賢傳下
卷二十六

八

象數變山崩地震未易遽數是將小則有水旱之災大則有亂亡之應非徒然而已也而文景克承天心一以養民爲務今年勸農桑明年減田租懇愛如此宜其民心得而和氣應也臣竊見前年秋孛出西方彗出東方去年冬彗見東方復見西方議者謂當除舊布新以應天變臣以爲曷若直法文景之恭儉愛民爲理明義正而可信也天之樹君本爲下民故孟子謂民爲重君爲輕書亦曰天視自我民視天聽自我民聽以是論之則天之道恒在於下恒在於不足也君人者不求之下而求之高不求之不足而求之有餘斯其所以招天變也其變已生其象已著乖戾之幾已萌猶且因仍故習抑其下而損其不足謂之順天不亦難乎此六者皆難之目

也舉其要則脩德用賢愛民三者而已此謂治本本立則紀綱可布法度可行治功可必否則愛惡相攻善惡交病生民不免於水火以是爲治萬不能也其四曰語古之聖君必曰堯舜語古之賢相必曰稷契蓋堯舜能知天道而順承之稷契又知堯舜之心而輔贊之此所以爲法於天下可傳於後世也夫天道好生而不私堯與舜亦好生而不私若克明俊德至於黎民於變敬授人時至於庶績咸熙此順承天道之實也稷播百穀以厚民生契敷五教以善民心此輔贊堯舜之實也臣嘗復熟推衍思之又思參之往古聖賢之言無不同驗之歷代治亂之迹無不合蓋此道之行民可使富兵可使強人才可使盛國勢可使重夙夜念之至熟也今國家徒

河內縣志

先賢傳下
卷二十六

九

知歛財之巧而不知生財之由徒知防人之欺而不欲養人之善徒患法令之難行而不患法令無可行之地誠能優重農民勿擾勿害毆游惰之人而歸之南畝課之種藝懇諭而督行之十年之後倉府之積當非今日之比矣自都邑而至州縣皆設學校使皇子以下至於庶人之子弟皆入於學以明父子君臣之大倫自洒掃應對以至平天下之要道十年以後上知所以御下下知所以事上上下下和睦又非今日之比矣二者之行萬目斯舉否則他皆不可期也是道也堯舜之道也孟子曰我非堯舜之道不敢以陳於王前臣愚區區竊亦願學也其五曰天下所以定者民志定則士安於土農安於農工商安於爲工商則在上之人有可安之理矣夫民

不安於 屋必求祿仕仕不安於卑位必求尊榮四方萬里
輻輳並進各懷無厭無恥之心在上之人可不爲寒心哉臣
聞取天下者尚勇敢守天下者尚退讓取也守也各有其宜
君人者不可不審也夫審而後發發無不中否則觸事而遽
喜怒之色見於貌言出於口人皆知之徐考其故知其無可
喜者則必悔其喜之失無可怒者則必悔其怒之失甚至先
喜而後怒先怒而後喜號令數變喜怒不節之故也是以先
王潛心恭默不易喜怒其未發也雖至近莫能知其發也雖
至親莫能移是以號令簡而無悔則無不中節矣夫數變不
可也數失信尤不可也周幽無道故不恤此今無此何苦使
人之不信也書奏帝嘉納之衡自見帝多奏陳及退皆削其

河內縣志

先賢傳下
卷二十六

十

草故其言多秘世罕得聞所傳者特此耳衡多病帝聽五日
一至省時賜尚方名藥美酒以調養之四年乃聽其歸懷五
年復召還奏對亦秘六年命與太常卿徐世隆定朝儀儀成
帝臨觀甚悅又詔與太保劉秉忠左丞張文謙定官制衡歷
考古今分併統屬之序去其權攝增置冗長側置者九省部
院臺郡縣與夫后妃儲藩百司所聯屬統制定爲圖七年奏
上之翌日使集公卿雜議中書院臺行移之體衡曰中書佐
天子總國政院臺宜具呈時商挺在樞密高鳴在臺皆不樂
欲定爲咨稟因大言以動衡曰臺院皆宗親大臣若一忤禍
不可測衡曰吾論國制耳何與於人遂以其言質帝前帝曰
衡言是也吾意亦若是未幾阿合馬爲中書平章政事領尚

書省六部事因擅權勢傾朝野一時大臣多阿之衡每與之議必正言不少讓已而其子又有僉樞密院之命衡獨執議曰國家事權兵民財三者而已今其父典民與財子又典兵不可帝曰卿慮其反邪衡對曰彼雖不反此反道也阿合馬由是銜之亟薦衡宜在中書欲因以事中之俄除左丞衡屢入辭免帝命左右掖衡出衡出及闕還奏曰陛下命臣出豈出省邪帝笑曰出殿門耳從幸上京乃論列阿合馬專權罔上蠹政害民若干事不報因謝病請解機務啼惻然召其子師可入諭旨且命舉自代者衡奏曰用人天子之大柄也臣下泛論其賢否則可若授之以位則當斷自宸衷不可使臣下有市恩之漸也帝久欲開太學會衡請罷益力乃從其請

河內縣志

先賢傳下
卷二十六

十一

八年以爲集賢大學士兼國子祭酒親爲擇蒙古弟子俾教之衡聞命喜曰此吾事也國人子太朴未散視聽專一若置之善類中涵養數年將必爲國用乃請徵其弟子王梓劉季偉韓思永耶律有尙呂端善姚燧高凝白棟蘇郁姚燦孫安劉安中十二人爲伴讀詔驛召之來京師分處各齋以爲齋長時所選子弟皆幼稚衡待之如成人愛之如子出入進退其嚴若君臣其爲教因覺以明善因明以開蔽相其動息以爲張弛課誦少暇卽習禮或習書筭少者則令習拜跪揖讓進退應對或射或投壺負者罰讀書若干遍久之諸生人人自得尊師敬業下至童子亦知三綱五常爲生人之道十年權臣屢 漢法諸生廩食或不繼衡請還懷帝以問翰林學

士王磐磐對曰衡教人有法諸生行可從政此國之大體宜勿聽其去帝命諸老臣議其去留竇默爲衡懇請之乃聽衡還以贊善王恂攝學事劉秉忠等奏乞以衡弟子耶律有尚蘇郁白棟爲助教以守衡規矩從之國家自得中原用金大明歷自大定是正後六七十年氣朔加時漸差帝以海宇混一宜協時正日十三年詔王恂定新歷恂以爲歷家知歷數而不知歷理宜得衡領之乃以集賢 學 兼固 教領太史院事召至京衡以爲冬至者歷之本而求歷本者在驗氣今所用宋舊儀自汴還至京師已自乖舛加之歲久規環不叶乃與太史令郭守敬等新製儀象圭表自丙子之冬日測晷景得丁丑戊寅巳卯三年冬至加時減大明歷十九

河內縣志

先賢傳下
卷二十六

十一

刻二十分又增損古歲餘歲差法上考春秋以來冬至無不盡合以月食衝及金木二星距驗冬至日躔校舊歷退七十六分以日轉遲疾中平行度驗月離宿度加舊歷三十刻以綫代管闕測赤道宿度以四正定氣立損益限以定日之盈縮分二十八限爲三百六十六以定月之遲疾以赤道變九道定月行以遲疾轉定度分定期而不用平行度以日月實合時刻定晦而不用虛進法以躔離朏朧定交食其法視古皆密而又悉去諸歷積年日月法之傳會者一本天道自然之數可以施之永久而無弊自餘正訛完闕蓋非一事十七年歷成奏上之賜名曰授時歷頒之天下六月以疾請還懷皇太子爲 於帝以子師可爲懷孟路總管以養之且使東

宮官來諭衡曰公毋以道不行爲憂也公安則道行有時矣其善藥自愛十八年衡病革家人祀衡曰吾一日未死寧不有事於祖考扶而起奠獻如儀旣撤家人餒怡怡如也已而卒年七十三是日大雷電風拔木懷人無貴賤少長皆哭於門四方學士聞訃皆聚哭有數千里來祭哭墓下者衡善教其言煦煦雖與童子語如恐傷之故所至無貴賤賢不肖皆樂從之隨其材昏明大小皆有所得可以爲世用所去人皆哭泣不忍舍服念其教如金科玉條終身不敢忘或未嘗及門傳其緒餘而折節力行爲名世者徃徃有之聽其言雖武人俗士異端之徒無不感悟者丞相安童一見衡語同列曰若輩自謂不相上下蓋十百與千萬也翰林承旨王磐氣槩

河內縣志

先賢傳下
卷二十六

十二

一世少所與可獨見衡曰先生神明也大德二年贈榮祿大夫司徒謚文正至大二年加正學垂憲佐運功臣太傅開府儀同三司封魏國公皇慶二年詔從祀孔子廟廷延祐初又詔立書院京兆以祀衡給田奉祠事名魯齋書院魯衡居魏時所署齋名也子師可

元史本傳

長子師可字可臣志趨端正學術真純有文集遺世由河東按察副使歷衛輝襄陽廣平懷孟總管終通議大夫贈禮部

尚書諡文簡崇祀鄉賢

家傳

四子師敬字敬臣由監察御史吏部尚書中書叅知政事國子祭酒太子詹事中書左右丞翰林學士承旨知經筵事由西臺中丞拜御史中丞光祿大夫明經務誠學尚節槩有父

風謚文穆崇祀鄉賢

同上

孫從宸字希元仕監察御史終河東山西廉訪副使從憲字
 希先仕歸德府知府從宜字希政仕翰林國史院經歷太常
 禮院判從宣字希文仕工部尚書從宗字希魯出章佩監
 珍異庫提點歷監察御史工部侍郎集賢學士曾孫紹祖字
 克學仕兵部侍郎歷戶禮兩部尚書崇祖字克孝仕平陸縣
 尹得山字克仁仕樞密院副使五世孫至剛字任道贈登仕
 郎四川僉事翥字雲翰仕威遠縣知縣六世孫字彥德明
 貢生仕湖廣德府知事七世孫偉字季高由貢生任魯府
 審理八世孫泰和字舜民由貢生任陝西武功縣知縣泰寧
 字舜卿由貢生任江西瑞州府檢校九世孫世道字子傳嘉
 靖癸卯科舉人任山東安邱縣知縣世教字子授由貢生任
 長垣縣訓導世同字子野由貢生任山西嵐縣知縣十世孫
 宗曾字思約萬歷乙酉科舉人任直隸慶都縣知縣陞湖廣
 永州府同知十七世孫天培字子直
 國朝乾隆甲寅科舉人任通許縣教諭秋實字西成嘉慶庚
 申科副貢充實字在中歲貢生天鵬字鳳如嘉慶十八年學
 政姚奏明咨部准補奉祀生員子孫繁盛爪爬雲仍蓋至今
 簪纓不絕云同上

呂域字伯充河內人七世祖公緒與宋丞相公著為從昆弟

河內縣志

先賢傳下
卷二十六

十四

祖庭

亂去鄉里父佑歸附初隸兵籍轉從北郡復至

關中家焉廉希憲宣撫京兆聘許衡教授生徒域從衡學衡
 為國子祭酒舉域為伴讀助成教養域之功為多至元十三
 年擢陝西道按察司知事未行會宋降者言襄漢新附民情
 未安有呂子開者向為襄陽制置司參謀官今退居鄂其人
 悉知宋事宜徵用之朝廷議遣使而難其人或言子開舊名
 偉金亂入宋更名文蔚字子開於域為從叔父宜遣域行時
 江淮兵猶未戢域聞之慨然請行子開既入覲陳安撫襄漢
 便宜詔以子開為翰林直學士辭不就十四年授域四川行
 樞密院都事時宋制置使張班守重慶安撫使王立守合州
 詔樞府分兵取之李德輝行西院事於成都獲立偵卒張郃

等數人將殺之域曰彼不卽降者以昔嘗抗命城降懼誅耳
今宜釋郃等俾歸諭立未幾立果遣郃等賫蠟書至成都德
輝請與東院同受降後期不至德輝承制授立仍爲安撫使
知合州開倉賑民禁戢剽掠而瀘叙崇慶思播夔萬等郡聞
之相繼送款巴黔民感域與德輝之惠並祠事之東院耻其
無功誣德輝越境邀功械立於長安獄將誅之域適以事至
京師言於許衡衡白留守賀仁傑遂奏釋立賜金虎符仍舊
官域亦以平定四川功 賜金織衣弓刀勒白金陞奉訓大
夫四川行省左右司郎中十九年調同知順慶路總管府事
以疾辭二十年徵爲國子司業以未終喪辭三十年改華州
知州勸農興學具有成效及代民爭留之大德中河東關隴

河內縣志

先賢傳下
卷二十六

十五

地震月餘不止域與集賢學士蕭欒各設問答數千言以究
其理且移書廟堂陳救災弭患之道仁宗卽位召拜翰林侍
讀學士時方議行科舉域曰經明行修質而少華非惟士有
實行國家當得真才以登治平未幾致仕延祐元年遣使給
驛送還關中十二月以疾卒年七十八贈陝西行省叅知政
事追封東平郡公謚文穆子三人杲果楨皆顯仕孫魯濟寧

路總管 本傳

聞從爲新安尉道遇驅驢行商數輩見其中一人嘯歌殊常
縛而詰之乃盜也客有鬻麥遇害未得主名從召諭屍傍居
人其一巧飾不置 從申諭以人性皆善若曹第爲饑寒切
身致此耳其人遂伏辜又物色得劫寇於鄭捕繫之人皆以

爲神明 舊志

王任字遵尹至正初任溫縣尹有治績百姓愛之記德政勒

石 府志名宦傳

明

王黻字文繡正統間舉人爲山東嶧縣令廉明仁惠興學勸農嶧土瘠民多逋黻給牛種課其勤惰招撫流亡復業者萬餘口教民戶種桑棗百本婦女歲蓄旨八十斤以時單騎檢民間違者笞比三載田皆可耕戶皆可賦教民如教子弟不可犯然重朴責民不率教者初犯紀其過釋之再犯詆詈之三犯懲有差禱旱輒雨祝蝗蝗不入境嶧鄰沂州滕縣沂滕之民無不欲得黻爲其長上嶧且恐叩闕籲留者千餘人邱

河內縣志

先賢傳下
卷二十六

十六

文莊商文恪以詩贈焉任嶧十八載以疾歸嶧民輦粟資其家不受比卒祀鄉賢後數十年滕之黃公中色爲河內令曰賢如王公奈何不尸祝之捐金建祠北郭歲時致祭 舊志

劉志成化初除武功令凡所施行務存長厚民服其教不忍私違也嘗值歲旱聞太白靈湫身往禱之或以山多陰氣恐其羸憊冒寒止之不聽卒致湫求雨隨至各霑足其所未至則絕無涓滴百姓迎勞道左以數萬計見雨來則爭以雨具授公公麾去曰此神貺我民者我何可褻易不敬九年致仕去老幼婦子哭隨攀號者不可勝數 同上

何塘字粹夫武陟人年七歲見家有佛像抗言請去之十九讀許衡薛瑄遺書輒欣然 食宏治十五年成進士選庶

吉士閣試克已復禮爲 論有曰仁者人也禮則人之元氣而已則見侵於風寒暑濕者也人能無爲邪氣所勝則元氣復元氣復而其人成矣宿學咸推服焉劉瑾竊政一日贈翰林川扇有人而拜見者瑋時官修撰獨長揖瑾怒不以贈受贈者復拜謝瑋正色曰何僕僕也瑾大怒詰其姓名瑋直應曰修撰何瑋知必不爲瑾所容乃累疏致仕後 誅復官以經筵觸忌諱謫開州同知修黃陵岡隄成擢東昌府同知乞歸嘉靖初起山西提學副使以父憂不赴服闋起提學浙江敦本尙實士氣丕變未幾晉南京太常少卿與湛若水等修明古大學之法學者翕然宗之歷工戶禮三部侍郎晉南京右都御史未幾致仕是時王守仁以道學名於時瑋獨默如

河內縣志

先賢傳下
卷二十六

十七

嘗言陸九淵楊簡之學流入禪宗充塞仁義後學未得游夏十一而議論卽過顏曾此吾道大害也里居十餘年教子姓以孝弟忠信一介必嚴兩執親喪皆哀毀後諡文定所著陰

陽律呂儒學管見柏齋集十二卷皆行於世

明史儒林傳案
史稱武陟人而

康熙志以爲縣人蓋史
據名籍而志稱土著云

周道字大經號竹溪受學何文定嘉靖丙戌進士授蠡縣令平易多惠政以憂去改玉田尋擢御史巡按宣大時大同新變道請戮其元惡餘罔治軍民帖然肖其像於太平樓祀之後巡撫真定扈駕南狩塗次劾權責爲黨人所擠褫歸家居二十六年角巾布衣坦率無忤巡撫劉應節稱其自少至老赤子之心不失世以爲確論祀鄉賢

舊志

婁樞字子靜少爲諸生師事何文定學使蕭公校士嚴切多士惴慄罔不以首觸地樞長跪不伏蕭詢其名益重之嘉靖乙酉領鄉薦入成均會朝紳議禮各樹幟不相下又崇尚陽明之學且爲洛蜀黨樞著克伐怨欲論四章爲陸大司成林少司成所心折一時索二公文者悉樞捉刀後以太學沿襲故事失作人初意上書切諫二公怒遂絕弗與通及授廣宗令劉撫軍籍民兵樞謂擾民上鄉兵議劉面從實心銜之適樊直指問安民去貪之略應以所令勿反所好作去甚論刺之樊

民肖像祀之比歸無以謀朝夕設皋比於東明曹縣者二十餘年著經學史學子學政學五朝文教等書行世卒祀鄉賢

河內縣志

先賢傳下
卷二十六

十八

劉涇字叔清號次山少時有鄰女贈芍藥杜門謝去登賢書後益肆力濂洛之學師事何文定成進士授庶吉士改御史巡城值邊警且旦夕逼城下居民蹙蹙涇守北城開門收納全活萬衆按滇中遐方服其簡靜出守鳳翔屬邑以羨金三千進涇笑曰世豈有受羨金劉次山哉尋以外艱去補登州知府長吏聞風滌慮晉山西兵備防秋駐師雲中八角堡遇警躬擐甲胄厲衆固守朝議方擬大用伎者以蜚語中之罷歸推本何文定之學著有理學四先生言行錄及京華滇南晉陽三集行世與婁樞同脩郡志高簡有法一時稱爲先輩

典型卒祀鄉賢

郝綰字玉卿宏治己未進士釋褐刑部郎中江西民有以刻

龍舟被逮者長官阿劉瑾意必欲寘之死地令縮檢出格事例縮檢得匿卧席下其人得不死遷四川僉事士官節貴等嘯聚數千人縮單騎往諭旋皆降散按部隆慶川謀報賊男婦行劫村落縮曰賊出没疾於飛鳥肯攜婦女行乎此必有被驅良民在焉及捕得果然命盡釋之總制彭幸菴調縮勦叛軍范藻等縮陳議將八事咸見采納尋奏捷縮素剛不爲衆所理入覲以言官劾致仕及幸菴內召首稱縮之屈陳其大功數十於是朝廷錫彩段羊酒諭勞再四云

簡重厚以歲貢生選合肥訓導陞長葛教諭陳州學正彰德教授所至整躬課士如金在冶既卒長葛以名宦請祀河內以鄉賢請祀

以上舊志

河內縣志

先賢傳下
卷二十六

十九

朱載堉篤學有至性痛父非罪見繫築土室宮門外席藁獨處者十九年厚烷還邸始入宮萬歷十九年厚烷薨載堉曰鄭宗之序盟津爲長前王見 既錫諡復爵矣爵宜歸盟津後累疏懇辭禮臣言載堉雖深執讓節然嗣鄭王已三世無中更理宜以載堉子翊錫嗣載堉執奏如初乃以祐樞之孫載璽嗣而令載堉及翊錫以世子世孫祿終其身子孫仍封東垣王二十二年正月載堉上疏請宗室皆得儒服就試毋論中外職中式者視才品器使詔允行明年又上歷算歲差之法及所著樂律書考辦詳確識者稱之卒諡端清

明史鄭王傳

何永慶字善夫步 有先民風以進士授壺關令建城修學民間勒石紀之丁父艱服闋補固安令治如壺關兩地俱祀

名宦升刑部主事調兵部陞通政司叅議上諭近臣曰何永慶舉動不
每學之爲上所重如此歷右通政致仕
祀鄉賢

王瀛字崇賢孝子履元孫歲貢生任靈璧訓導丁艱旋補沙河訓導陞靈石教諭課士如治身不少懈何文定贊其像曰有德有文儒之君子卒祀鄉賢孫所用萬歷庚戌進士蕭守身字尙本少問業於 文定稱長者嘉靖壬戌進士授襄垣令修城隍廟得銀器一窖鄉三老欲以佐朝夕不納陞戶部主事歷郎中抗言節用十八事上嘉納之理太倉督大同餉前後 羨金萬一千有奇大吏具以聞會馮璫驕恣觸忌出守臨洮調保寧陞鹽運使乞休家居二十餘年著有經

河內縣志

先賢傳下
卷二十六

二十

書辨疑醫學管見及詩文集各若干卷沒後蜀人張樸張望賢過其家哭甚哀家人問故樸曰樸竄人子先生鞠我先生延師督教我匪先生安望捷南宮 望賢曰小人聘某宦女某後悔之明公給女出嫁於公堂今生子已名德蕭矣各揮淚去襄垣保寧祀名宦河內祀鄉賢

楊初東字元夫舉人授保寧推官丁艱補兗州讞訟無所枉陞戶部主事因贊定大本事觸諸璫怒坐是爲郎十九年吏部屢疏請擢用俱留中後得四川叅政以老乞歸家居以長子之璋進階中大夫之璋進士祠部郎次之璋舉人卒祀鄉賢

李從諒字信甫歲貢生任鍾離訓導陞輝縣教諭自少至老

無謾語多士式焉以子政修贈奉直大夫祀鄉賢

蕭守美字尚綱少孤從母受章句輒抱書泣不忍嬉爲諸生號閉戶先生比將貢大庭首守美次唐生唐生耄不克待守美讓唐生當事義之爲杞縣訓導陞順德教授捐俸調多士不能婚葬者曰吾少孤固悉若苦歸里有酒客卧詈其門覆以被比醒慚數載不敢逕其巷卒祀鄉賢

鄒之任字際可幼失恃事繼母如母嘉靖己卯科舉人司理劉公應沙下車踰歲不識之任指其名告人曰吾澹臺滅明也授臨洮司理丁艱起復補鞏昌攝寧遠篆清徭革弊里人立碑記之卒祀鄉賢

顧師魯字唯甫七歲能文痛母孀居益自刻苦萬歷庚戌成

河內縣志

先賢傳下
卷二十六

二十一

進士卽表母苦節狀以聞上嘉之除清豐令有能聲陞刑部主事餉密雲 卒於途祀鄉賢

字行素萬歷庚戌進士知福寧州州瀕海多盜賊所用下車擒其豪州境肅清尋調守澤州裹糧往絲粒無資於澤澤強藩夙稱難治畏其峻潔罔不馴服報最爲天下第一陞車駕司員外郎轉武庫司郎中調職方司職方自總兵下例輿金爲殿最所用槩謝絕出爲陝西叅政車一輛蒼頭二人而已頃之以疾歸二載強起爲山西叅政晉秩方伯備兵上黨上黨以紬貢上方月供備兵使者樣紬十二端舊矣所用悉蠲除至今上黨無供樣紬者以劾墨令不少假令噉有力者擠所用所用振衣歸搆書香樓課子著有 金人銘書

香樓戒語晉人以負販抵懷者過其廬嘗置所負以手加額叩門而後去卒祀鄉賢子玉汝以貢生授句容令孫錫祉順治丁酉舉人

國朝

劉天池字溟海歲貢生爲虞城訓導教士不倦舉止端凝學術淹博卒祀鄉賢

楊挺生字循如寧夏巡撫嗣修子揮金交天下士天下士緩急倚之洛陽石孝廉某以堡民誤殺左良玉兵左欲殺石以償命魯山宗進士麟祥忤邑令令愆大吏褫服對簿挺生疾馳救之皆脫於難然石與宗實非素相識者 國初以明經署開封司理尋補平陽司理丁巡撫公艱補桂林司理以疾

河內縣志

先賢傳下
卷二十六

一一二一

不克赴先是闖逆繫維鄉大夫實關中巡撫公八十一歲矣挺生掖老父潛居雁塔寺迂道邃谷渡蒲坂由聞喜垣曲邏卒充斥中竟全首領歸人以爲孝感所致云卒祀鄉賢子奇蘊舉人

李政修字粹然萬歷丙辰進士授介休令丁內艱起復補淄川節省馬價八百金悉充逋賦調滋陽擢禮部郎中遷濟南道視左轄篆却岱宗香稅三千金遷嘉湖道再遷濟南道未任乞休頃之起冀南道歲祲道多棄兒修慈幼局收鞠之國初薦補天津道陞淮海道卒於官郡人謂政修殂後無復以地方利弊抗言於監司守令者祀鄉賢

史應選字念冲萬歷丙辰進士歷官州牧遷蘇州知府舊例

歲貢太守樣緞百餘匹悉却去比三載以郵傳註誤罷歸
國初授濟南知府陞南瑞道逾限罷一蹇一力縱酒高歌詼
調自樂嘗著人箴一則有云心逸日休者天下拙人心勞日
拙者天下巧人亦可以想見其生平矣卒祀鄉賢

沈嘉顯字岫陽崇禎甲戌進士授萊陽令以清惠著歷任慶
陽僉事賀珍攻西安急全陝震動嘉顯瀝酒誓師將士咸泣
下願効死卒奏捷尋擢西寧叅議值回變將士用命如慶陽
時遂殲厥渠魁餘皆就撫歸里後好遊覽遇人輒飲以酒飲
輒醉著有寶刀歌劍鳴草祀鄉賢

史應聘字任甫應選弟性亢爽厲廉隅天啟乙丑進士知豐
潤調寶坻時烽火逼燕京近都郡邑多陷寶坻獨完天子以

河內縣志

先賢傳下
卷二十六

一二十二

爲能擢給事中因建言斥歸崇禎壬申流寇陷修武郡城危
迫當事問計應聘抵掌談方畧懷人倚焉逆闖敗奔西武豫
王將兵入秦應聘應薦備兵潼關苗薶髮櫛皆所夙嫺以疾
乞休著有瓠餘集問犁草祀鄉賢

蔡魁春字元之由選貢仕五臺令以均里甲繕城守爲先猝
有寇警薄城下魁春乘其無備出兵破之寇悉遁去解組後
鄉鄰有緩急嘗傾囊賙之有窶人子故家子弟也贈以金令
返里復業子毓秀舉人順治十七年祀鄉賢

陳來朝字宏化萬歷癸卯舉人仕深澤令歲饑捐俸以賑招
集流亡民多歸之陞鞏昌郡丞撫軍檄監隴右軍有能聲旋
里後輕袷緩步若未嘗登仕版者康熙元年公舉祀鄉賢

范安字子仁嘉靖癸未進士博涉子史由瀛海司理擢御史
巡按粵西粵西人頌之卒祀鄉賢

范印心字正安少豪宕不羈順治丁亥進士授崞縣令有能
聲會姜襄叛僞檄日三四至輒碎 斬其使賊怒犯崞印心
堅守危城身親矢石鬚髮爲白及 王師至協力勦捕卒平
其亂陞戶部主事權稅西新持大體不尙苛細商旅便之陞
郎中遷浙江杭嚴道果毅有守時武林喜佞佛印心嚴禁以
正風俗爲忌者所中事白轉口北道尋補河東道黜奸清蠹
上下憚之丁內艱歸遂卒祀鄉賢

鄒楷字範夫八歲時母病禱於神願以身代比長有張某者
因逋負不敢家居楷歎曰此寥寥者乃至間人母子歡耶焚

河內縣志

先賢傳下
卷二十六

一二十四

券招之使歸凡戚里婚葬及有緩急者輒施予無倦容以明
經官汝寧訓導陞教授祀鄉賢

竇可權字雲明少時持重不嬉戲比長沈靜好學平居粥粥
無他長及臨利害應機立斷屹然不可搖撼順治己丑進士
授汾州司理汾州殷富甲天下可權儉約自矢一切餽遺無
所受其大吏利富翁某多金以事屬可權徃返十七牘卒不
應沁州牧某欲以利啗可權秘置十鎰於牀褥間可權檢還
牧牧大慚分校晉闈得陳廷敬等六人皆一時名宿後去官
不載汾州一物奴婢之籍不增一人性至孝先人遺業盡畀
母弟母益歡捐館日遠近皆爲流涕康熙十三年祀鄉賢

以上

王之翰字大宗崇禎壬午舉人少值歲祲自郡取餼金歸塗遇友人子困甚出金予之

國朝知沔陽縣所部或以賂進笑曰博士弟子尚不愛餼金從大夫後肯以苞苴敗節耶沔陽人德而祀之

成王臣字廷弼明末諸生嘗從父游鞏洛督師孫傳庭自秦關進勦河南北轉輸者會大雪不能炊王臣乃煮粥濟人

國朝中順治辛卯舉人補襄城教諭擢知三河縣罷徭役值建

陵園民負石冰上手足皸瘃王臣代以車運比罣誤民千人

額

闕請留任考最擢知景州清操自勵乞老歸築室沁水之陽

河內縣志

先賢傳下
卷二十六

二十五

讀書其中性孝友母喪毀瘠幾不能起里人咸服其孝義焉范發愚字元穎順治丙戌進士知廣靈縣姜襄之變奸民有爲賊內應者捕得立寘諸法飛檄乞援大同兵至城賴以全先是土人或據堡自固有誣爲叛者俘其老弱發愚曰民避死耳非叛也若輩堅壁清野不愈於開門揖盜耶卒索老弱歸之權稅揚州海寇突至率家丁堅守得無恙卒祀鄉賢鄒玗字石玉順治己亥進士歷任臨洮府同知監河州軍時番人窺

國家用兵巴蜀突圍河州玗單騎至番營數其三罪立解去鄴人姚月攀卒於官不能歸葬已二十年會玗擢知東昌府爲姚子措輿櫬之費使歸鄴人至今高其義云

楊運昌幼遭寇變流離中手不釋卷中順治丙戌進士由庶常歷任工部右侍郎居官二十七年凡應詔陳言俱切中利弊因母老乞終養歸卒祀鄉賢

任倫備康熙辛未進士官江西永寧縣知縣永寧風俗薄惡侈靡相競每一嫁女粧貲之費輒至破家故民間生女多不舉倫備到官禁令先行凡生女免其差徭賞以花紅遂蒙存活縣北七谿嶺山路崎嶇行旅苦之捐貲治道商賈便利其勸墾荒田設立義學修理文廟諸善政指不勝屈嘗謂族人曰吾先人耕讀爲業贈汝以財其惠有限不若贈汝以言其利無窮嘗敦詩說禮以承先訓則此生永有濟矣在官咨取文選司主事陞驗封司員外郎轉考功司卒祀鄉賢

河內縣志

先賢傳下
卷二十六

二十六

蕭家芝字紫眉慷慨負氣不輕爲然諾河內令王漢甚重之督學黃閨中竒其文呼爲蕭兄而不名人

國朝中順治壬辰進士歷官刑部郎中恤刑江左將行大司寇陰屬以事家芝持不可曰公欲我殺人以媚人乎司寇不懌尋乃大悔曰公言是也遂寢其事明年恤刑山西人不敢干以私閱囚多所平反時當姜襄亂後家芝手繙爰書恒漏下三十刻不休至代州嘔血數升釋大辟七十人巡按詰以宥多狀家芝曰當論公私不論多寡秩滿入都以失出降級遂歸居丹林三十餘年當事者重之屬修郡邑志皆可觀有丹林集六卷行世弟家蕙子瑞延瑞苞

家蕙字樹百少儻善文與家芝稱二難順治乙酉與兄同

舉於鄉丁亥先成進士授朔州知州歷宮工部員外郎

瑞延字仲常幼聰慧工詩有甘谷園詩一卷以病拘攣老於家子健康熙丙子舉人

瑞苞字叔方總角爲文每出奇語年二十二食餽屢試不售益肆力於古問奇者戶履嘗滿年踰四十貢太學偕喬騰鳳重修府志康熙四十四年銓授浙川教諭卒於官著有陽洛山房文稿燕石草

賈光烈字冊馨順治己亥進士知英德縣新文廟設鄉學讀律令俾人知所嚮先是英有兩驛曰溈陽曰清溪民苦供億光烈以地非大衝請裁清溪驛邑民王宣幼聘劉文女宣家中落文思毀盟訟於庭光烈趣吏舁肩輿使宣迎婦歸且捐

河內縣志

先賢傳下
卷二十六

二十七

俸治奩具英人爲之歌曰掾吏娶女從事具車錦襜褕繡襠襦鼓聲殷殷迎者姝闐城溢郭歌且歛陳啟吾者大猾也光烈出不意擒治之寘諸法陳之黨以蜚語中傷光烈竟罷歸有唁之者笑曰吾道當如是也

張鐸字宗尼居家孝友以禮法自持雖博學能文慊然如不及後以歲貢司訓嵩縣訓迪不倦士人思慕之

范淳字伯諧其先山西洪洞人曾祖戶部尚書濟世自濟源再遷河內遂著籍焉自少力學博覽經籍必探其旨及壯潛心理學嗜朱子書榜其室曰朱庵志篤信也又類宋儒語爲笥中五集康熙雍正間當事者累薦之會病不赴知府任應烈重其學行延致懷仁書院教授生徒一以白鹿洞學規爲

法卒年七十三淳弟濬亦博學好古至老與兄讀書東湖別墅昕夕不倦時稱二難云

王紹文雍正壬子舉人任天津長蘆場鹽大使場有貢木置河灘水暴漲將漂入海紹文立木上曰吾職司典守誓與此木俱存俄而水平人以爲忠誠所感云

王兆鰲字元素康熙甲午舉人讀書以古人自期充教習期滿

欽賜內閣中書告歸後嗜學不倦樂引後進著有五倫金鏡錄並座殤文年垂九十而卒子錫璋錫瑒

錫璋字丹麓雍正巳酉拔貢例發往江南委用以不敢遽膺民社呈請國子肄業登進士任翰林院編修卒於官著有勸

河內縣志

先賢傳下
卷二十六

二十八

孝瑣言一則

錫瑒字宸清乾隆戊午舉人以孝聞父沒每歲時家祀輒悲咽流涕性濶達喜施與舉動必以禮仕河南府宜陽縣教諭選永興縣知縣未至官卒

以上府志

劉國興字振宇號毅齋其先山西榆次人世以武功顯父炳業利民叅將姜襄之亂死於兵家始散國興歷官至河北鎮總兵都督同知奏請入籍河內偕其兄子居焉初炳業之死也國興年十三兄弟四人各分散國興奉母避亂歷險幾死者數矣久之其生母趙及繼母魏皆死遂奮發走福建投故人帳下爲卒伍故人奇其膽略拔補把總四年陞提標後營守備當是時閩變蠡起古田焚掠尤甚國興以數騎討平之

而康親王入閩授遊擊劄付使守延平鄭錦據興化銀州漳
州以亂國興率衆自興化入會戰自己至未破賊衆萬餘斬
將三人俘僞總兵一人乘勝恢復仙遊猝至泉薄其城城險
不可入冒矢石衝雲梯與守埤者戰俘賊將五人泉州復戰
漳州連敗五鎮八鎮諸賊斬首萬餘級亂稍定既而復動從
昭武將軍提督楊公戰萬松關鳳山江東橋各斬數千人又
從諸軍會勦金廈二島遂逼臺灣破賊巢賊平功加十等以
都督僉事銜官湖廣叅將前後大戰以十數亦數被創賊復
圍泉州飛礮傷其一目最後又傷其左臂洞骨袍甲朱殷然
臨陳突戰不敢言病蓋其勇如此陞西安副將未赴改湖廣
督標中軍副將又從征噶爾旦功陞河北鎮總兵都督同知

河內縣志

先賢傳下
卷二十六

二十九

調廣東碣石鎮總兵官再調南韶鎮卒於官

賜祭葬時康熙四十四年也子世明錫瑗錫琛錫瓚世德世
明字際南由河北鎮標把總升開封營千總引

見授三等侍衛

特放二等侍衛領漢軍砲營章京征藏往西寧軍前至穆魯
烏蘇移駐甘州回京

挑頭等放領漢侍衛專達出爲紫荆關叅將歷陝西河州營
副將興漢鎮總兵署湖廣提督

特放甘肅巡撫調福建巡撫管理學政升福建總督子源達
郭世昌顧琮沈大中皆從孫夏峰奇逢于百泉山時夏峰已
六十九歲而三人負笈請業焉

王作梅字伯鼎康熙己卯舉人己丑進士授合肥縣知縣以治行內擢吏部主事旋授臺灣同知加知府銜以親老請養歸康熙丁酉宜陽民變當事勦捕已越二載作梅以謁選入都適韓城張大司寇奉

命視師得便宜行事司寇作梅座主也因往謁曰河南安有亂民皆有司過聽胥役驅之耳聞用兵以來百姓怨其郡守及河鎮將兵者次骨若先易置二人而諭以順逆自當帖然矣司寇如其言不兩月而亂定不戮一人首惡遣戍而已雍正甲辰漕議起將盡取丹水入運儀封張清恪公主其說以前懷守方願瑛董其事作梅將赴臺灣途遇願瑛咨以漕事作梅曰丹水平時一綫耳夏秋之交洶湧瀾漫輒里許公所

河內縣志

先賢傳下
卷二十六

三十

知也今築石堤障其南此里許者安歸乎丹距運幾百里所濟能幾何水一發則沿河上下數十村皆爲魚矣願瑛以爲然偕至張公所言之寢其事家居三十年凡閭閻疾苦悉爲有司言之而未嘗干以私嘗自撰壙記謂生平不作一欺人語亦不受非義之財又謂文章之壞壞於雅俗共賞一言吏治之壞壞於名寔雙收一言治生之道惟農事爲最善盡其利不爲貪窮其術不爲巧其他弃信害義無一可者世以爲名言年八十五卒弟作朋

作朋字壽三康熙乙酉丙戌聯捷先其兄成進士年甫十九授江西鉛山令以治行卓異擢山西岢嵐州牧調蔚州再調霍州所至以廉明稱請養歸遭母喪以毀卒子詒穀雍正壬

子舉人

樊琳康熙丙戌進士官浙江慈谿知縣著循聲明趙文華慈谿人也惠於桑梓其後裔有家祠每春秋時祭請邑令主祭琳蒞任屆期吏請往琳拒之曰豈有讀楊椒山疏而拜趙文華者乎卒不往邑令主祭之事自是遂廢

任溥字潤九康熙己丑進士授廣東連山縣知縣蒞任朞月獄訟衰息所部肅然有廉吏風民皆尸祝之

范傑字子英幼嗣叔父九疇比長以孝聞不妄言語里中父老咸器之嘗遊粵西囊積千金將有所圖適戚黨有困於粵者以機事與之謀遂傾囊贈之某之事卒不就而傑亦坐是流滯於粵者十四年及子泰恒舉於鄉始迎之歸處族黨謙

河內縣志

先賢傳下
卷二十六

三十一

退若無能遇事有不可則執之不少易以故邑有大事悉資傑主辦守令咸重之邑舊例歲運粟數千石至衛輝輸官陸行三百餘里秋雨泥淖車轆轉不得進運浮米值猶往往愆期官民交困傑白令曰河內米值昂於衛輝若令民攜貲就彼地購米儲倉則費省而民不勞何所不可令從之至今稱便

婁涓承字松腹樞七世孫幼孤學於外氏凡八年旋補弟子貧食餼下帷講誦不與外事一日有少婦來奔却之然老而不遇年五十三以歲貢生爲滎澤縣訓導其教士嚴而有法滎澤枕廣武瀕黃河土田廢壞者十之二而糧不減邑人不堪其苦涓承奉例監收錢糧悉其情因數數爲邑令言之力

請於上官豁免空稅九百餘兩在官十年以老乞歸更十年方卒子阿巢

鄒玉章雍正甲辰進士初授故城縣知縣甫下車卽盡除邑中陋規於城門設木櫃令民按日投牒其中隨訊隨結改任江南知吳江縣以廉能著後任江西廣昌縣乞休歸讀書自娛著有居敬堂文稿

陳靜誠字實菴少孤事母葛至孝性精專攻苦讀書或時與之言而不應中乾隆辛酉舉人明年中明通榜選汜水縣教諭其邑令去爲同考官大吏檄靜誠代其事有諸生周氏者兄弟爭產訟數年不決或以賄陷靜誠靜誠怒曰爾兄弟不睦乃以賄污我耶我若以情達上官爾罪何追我不忍爾爾

河內縣志

先賢傳下
卷二十六

三十一

其速已此訟明日兄弟各以誠服焉母憂服闋選西華縣教諭助邑令修堤防濬河渠增高培厚與有力焉乾隆二十六年楊橋堤決水勢直衝西華適與所修堤等城得以無恙張肇基字條遠歲貢生家貧以授徒爲業其撫弟妹衣服飲食必過於諸子生平不閱非聖之書不議論人長短一以濂洛之學爲宗臨終囑生徒及諸子曰學以慎獨爲要吾終身守此兩字所著命解數篇人多傳之

成文字在中乾隆辛酉舉人辛未進士授甘肅高臺令高臺故瘠邑逋賦甚多又值國家征勦西夷民更勞悴文蒞任三年不忍嚴比坐催科不力降二級而承辦軍務一切妥協大吏倚如左右手西夷既定制府楊公應琚保荐軍功第一開

復原職簡發廣西署永寧州卒文博覽載籍尤長於詩著有玉汝堂集

白雲上字凌蒼又字秋齋本貫山西汾陽曾祖用始遷懷慶今爲河內人用官守備生三子天素天富天貴天素從征噶爾丹功加左都督天富早死妻張氏以節孝旌無子以天貴子光顯爲後卽雲上之父也初張夫人守節年才十九家貧甚事舅姑撫嗣子日用飲食皆出十指又每日節蓄錢十五積十餘年以爲舅姑買棺營葬之需致中指銷磨及半其艱苦如此光顯歷官汝寧守備從征策旺諸部落連勦烏里雅蘇太及二等朝朝水多科布多城吳心珠爾直至星宿海在軍七年與士卒均甘苦共饑飽臨陣奮勇屢瀕於危又督造

河內縣志

先賢傳下
卷二十六

三十二

土城木城皆如期就功凱旋當升都司以迎養張夫人願留汝寧不赴雲上喜讀書然英偉不羣自以爲累世將家思不墜其業於是讀書之暇并力操弓矢習騎射嘗冬夜射鵠欲睡卽引冰水淬臂不少休如是者十年乾隆庚午辛未連捷中武科進士

點藍翎侍衛俸滿出爲江南平望營都司都司爲提標專轄而巡撫陳文恭公一見卽器之謂提督齊公曰此後白都司有公事差使倉卒恐不及先問幸勿譴平望營駐吳江爲江浙錯壤面環太湖萑苻出沒號爲難治雲上以爲

國家重熙累洽中外肅清武臣以弭盜爲職任文臣以撫字爲殿最然奸宄伺政令之疎密以爲伏發兵丁又伺官長之

誠僞以爲勤情武臣雖專司緝捕於凡有益於民者可爲則爲之安得委有司自便耶於是當水程交錯處各置木柵稽察往來前後獲竊七十餘事行旅無警汛內悉安旣署江陰常州兩營遊擊升揚州營遊擊其緝捕一如平望其在江陰承檄捕蝗持竹竿立赤日中督兵丁保甲深治奔陷夜然束草蝗爭趨火光乘勢撲捕無遺類焉 在揚州總督高公晉檄移校武場于蜀岡之陽夾道 柳壯軍容休士卒更鑿泉以便汲飲名之曰柳營第一泉 揚城最多火灾其赴救也亦最力乘屋履危趨捷若飛先斷火道必勿使延往在平望亦然嘗有巨室被災後輦錢酬其卒伍立却之曰兵猶火也在作氣耳予以利將視貧富爲勤惰故其訓卒任以勵廉恥

河內縣志

先賢傳下
卷二十六

三十四

懲頑悍爲要又從總督過高郵有獺猫洞者附運河旁民田所資然當春夏漕運經行禁不得啟而時值炎暑田禾將槁民隨路號呼以求灌溉總督命往視之往卽探插底高下案舊水則酌水勢小大爲深淺啟閉之法總督以爲然民賴其利會前在常州有失察事部議降二級調用總督以爲雲上素勤職事此公罪可原奏請於

上得

旨報可遂不遷久之升金山叅將金山濱海城內四隅皆田先時海潮上湧積沙壅河田幾不治雲上撤俸疏濬河流四通後成沃壤擢漕標中軍副將衛所僚屬皆服其廉漕運總督亦以爲真君子人也乾隆四十五年

皇上南巡

賜宴桂家莊

賞大緞貂皮荷包蓋

特恩也尋保一等例當入

觀而精力驟衰遂病蓋雲上當官以來公事出入不避晝夜
思慮既竭形神又勞風霜悴之以致於病同官無不惜其去
者其生平設義學督課兵丁子弟及收恤親族諸事不勝紀
其受知陳高兩公爲最深尹文端公次之漕督鄂公又次之
陳文恭嘗貽以書什襲珍重一字不遺人咸謂有儒將風子
守清貢生守廉進士官合肥知縣

顧爾杰字南叟貢生歷官山西岳陽直隸完縣獲鹿二縣令

河內縣志

先賢傳下
卷二十六

三十五

所至以惠愛稱獲鹿有修城役爾杰實力督工不累一民派
一物合邑勒石志愛卒於任士民呼號如喪慈母往返二千
里不憚勞悴送其柩歸

李蕃字屏也祖笈康熙庚辰進士父麟書廩生蕃少孤依舅
以居弟幼弱蕃奉繼母撫弱弟志勤學亶亶不厭而尤以
不墮先志爲勗乾隆丁卯舉於鄉成進士以親老改選
汝寧府教授振興文教在官十五年門弟子登第者且數十
人性廉介俸餘不足自贍而日以養親訓諸子姪讀書爲急
不以家務經心既卒殯殮悉賴門人賻贈來弔者咸匍匐流
涕而而不能自己遂相與刻石誦遺愛焉子嘉禾姪嘉儀

張璽字篆六一字龍文天姿穎異讀書一過輒成誦乾隆壬

申 恩科中式舉人授陝州學正保舉授福建南靖縣知縣陞臺灣府澎湖通判未赴任海寇林爽文作亂或以賊勢方張沮之璽不可既蒞任選民壯練鄉勇設法守衛時鳳山彰化諸縣悉爲賊據澎湖密邇賊烽勢尤險危璽禦備有方卒以無患初璽以文藝受知於漳浦蔡葛山先生先生性嚴重致政家居投刺者多不納璽往輒欣然講論經史移時不倦其見禮於鉅公如此晚年致仕歸家無長物以授徒自給子弟年未冠不許衣帛嘗誦曰席父兄之力爲紈袴子非所望於爾曹也乾隆五十一年河內大飢捐家貲賙貧乏鄉 賴之後以壽終于家著有卜里詩草掌教卜里書院時作也

張鴻業字

乾隆癸酉舉人借補陳留縣訓導教迪士子

河內縣志

先賢傳下
卷二十六

三二十六

一如子弟然陳留人士至今思之所謂懷南先生者也子用達

李位東字泰瞻祖璜父克允縣學生位東乾隆乙酉選拔貢生考取滿洲正紅旗官學教習以知縣試用江蘇爲大吏所器凡有疑獄多委聽決宰阜寧有富室爭嗣構訟奉三千金爲壽立却之直其事父艱歸所居村甚窪下設法開澇河千二百餘丈以除水患一鄉賴之刻石以紀焉教授生徒于懸谷山中誘掖甚勤來學者至舍不能容服闋歷宰宜興崑山署松江府同知調丹徒縣卒年五十七子家駒縣學生家騏

府學廩生

李嘉儀字淑度父萱以古道自持教家甚嚴故鄉里咸號爲

古人嘉儀幼穎悟既長能詩與同輩倡和出言成章弱冠食
餼乾隆己亥副榜貢生性豪邁不羈遊京師徧交一時先達
受知於季堂胡公因箴之曰尙當斂華就實乃歸大肆力於
詩文曹耕陽故郡名士也共推詩壇主盟相與砥勵雖家無
擔石之儲而歌咏自娛處之晏如卒年三十以從弟子中行

嗣

靳文字某貧而勤學至老不倦乾隆壬申五格寨土人掘井
得古碑一文急往識之遂拓以傳于世卽北魏武德于府君
義橋石象碑也古碑之顯晦固自有時然向不得文其不爲
土人所碎也幾矣然則文亦好古之士歟

賈湘字滙川先世自洪洞遷河內高祖光烈英德知縣自有

河內縣志

先賢傳下
卷二十六

三十七

傳曾祖亮選裕州學正祖宗夔舉人鄉黨以孝稱父履信縣
學生後於世父履泰履泰亦縣學生也湘自幼以濫竽科第
取溫飽爲恥乾隆丁酉選拔貢生庚子中式舉人修四庫書
勞得知縣選江蘇金匱縣爲政廉明有富室某者本社氏奴
也居富自尊與主構訟某紳袒之以朱提三千爲緩頰湘曰
僕在家窮諸生也豈不知阿堵物爲可愛然一受奴苞苴將
爲奴驅策君視此措大能受奴驅策乎不聽大吏以爲廉調
震澤有寡婦育其遺腹子而夫弟利其產誣嫂有私者訊旣
得實幕客沈爲問怒絕之沈恥遁去福建沈故不諧於鄉及
其去爲去一虎矣邑以大治未幾復調元和民畏其威不敢
犯他州縣有疑獄悉委之平反甚多其可紀者金壇縣獲七

人傳爰書以爲盜湘推鞠非是釋之旣而他縣別獲囚訊實焉此則不特生七人亦全一縣令也會福建觀察某來爲按察司沈姓者偕之來因其浸潤湘竟罷歸以貧卒

夏錫疇字用九乾隆癸卯舉人祖士亮父光先錫疇幼知力學不屑爲舉子業少長砥節勵行以居敬窮理爲本嘗自以爲得志於時則崇實學端士習其急務也其舉於鄉時年五十二矣然以親老不果仕其序崔明楷會約曰近世之士聚學立業不越乎文字語言之間而其所謂文字語言者不過講章時文之技改頭換面刊新出奇以爲能其聰明游惰之士或且徵逐酒食是務劇飲戲謔以廢業以爲當世之所取者我可不學而能於是是有學亡之歎非謂學能亡也學之實

河內縣志

先賢傳下
卷二十六

三十八

亡焉耳乃述劉敏中告友之言願自幼至老相見而無愧色其生平未嘗授徒有就問者隨其材質與之言必以有恥爲先又以爲讀書不足以自給而兼耕耕又不足以自給乃賣藥於市而低昂其價值以效販易之術曰擇人而任時尚亦無惡於天道爲陶隱氏傳一篇自比於駟儈其建宗祠立宗規置義田皆有可法其學於易最深所著有讀易私抄私說強學錄功過格訓兒編強識錄強恕堂家範子安世在寬匡世

張用達字子兼號晴皋感化村人曾祖忠事親以孝聞祖振縣學生父鴻業別有傳用達性穎敏讀書過目卽解文格超拔詩以唐人爲宗五言尤適健中式乾隆戊申科舉人以授

徒爲業其教人曰無經濟之學非學無根柢之文非文也來學者隨其愚智必使自達郡中數十年其卓然自立不惑異趨者皆其弟子嘉慶丙寅秋大旱用達相度村外舊渠請於縣分上流之餘水以蘇村人歲仍有秋大挑一等改教職授封邱縣訓導其施教如其家惠愛甚著牛亮臣之亂滑與封邱接壤巡撫台公過封邱問守禦方略所陳四事多見施行用達與同城官分堞城守以勞當保薦縣令用達力辭上官重其恬退不强焉著有丹林詩草子楷進士模舉人

李嘉禾字穎實簡重寡言讀書強記過人年二十父沒歸葬貧不可支與從兄共爨庭無間言既從兄早卒撫嫁其遺孤女而奉養叔母終身戊申舉於鄉嘉慶己未成進士復官汝

河內縣志

先賢傳下
卷二十六

三十九

寧府教授先是嘗夢父謂己曰十年復舊業果如其兆云嘉禾性寬而有制平居循循愷悌不求甚異卽與子姪言亦惟恐傷之遇事不可則確然不移學者每疑問必反復推尋務盡道理聽者若已喻而言之尚津津不厭嘗曰人惟真爲難得無實而獲名可恥也早歲喪母每言及未嘗不流涕在汝十五年告歸卒於家著有讀易記疑子偉行

范桂園字秋坪嘉慶戊辰科舉人性孤介好爲詩受業於劉松嵐觀察之門爲入室弟子觀察稱其骨冷神寒近於郊島不輕暱一人而與之游不草草輕讀一書不孟浪作事於鄉黨蓋太行山下一孤介士也又嘗介於吳玉松太守太守稱其詩似方于李涇惜不永其年不得大昌其詩其事母以孝

聞與弟椿園尤友愛椿園蓋少長於桂園而椿園先死久之其孤汝瑛又死桂園哭之尤悲皆有詩見於集中其詩名見山草堂集計百六十七首觀察之所刻也

崔明楷字華升縣庠生父琮字泉聲縣學生著端蒙訓傳於家塾明楷幼好小學近思錄諸書從夏錫疇遊益厭浮華之學遂與同學約爲交修之會立功過譜讀書課程居家動遵禮法有儒者氣象晚取憂悔吝者存乎介之意號曰介齋著訓蒙七則介齋詩稿恩貢生任若海銘其墓

丁承前字繩武邑諸生性狷介與人落落寡合家四壁立然性至孝自食粗糲而父母甘旨不乏父母沒旣葬置木主於寢室每食必薦如生時陝州學某廣文其師也徃視之旣辭

河內縣志

先賢傳下
卷二十六

四十

歸念其貧而知其介也欲賙恐不受不賙則不忍乃誠僕而送諸途曰必勿反所攜承前不得已受之歸而返諸師家中年貧益甚或終日不舉火自作餅賣之衆人私相告曰此丁先生也宜善視之所持物頃刻都盡丁知之曰嘻非食而甘之也憐吾貧也卽攜物而之他嫻醫術服藥而愈者謝之亦不受卒以困苦終其身

王在寬字敷五性誠懇讀書務身體力行夏不解衣私居未嘗跛倚遇婦女急趨而過不及避必背面而立俟其去遠乃行見者咸謂其長厚平生教學以小學近思錄爲宗其弟子皆循循雅飭望而知爲禮法之士蓋其淵源皆本於夏錫疇也

曹啟佑字經畚邑庠生幼有至性好學家甚貧年十五卽設帳授徒得束脩市甘旨以奉親親老患病每藥必嘗衣不解帶者數年入庠後文譽噪甚因竭力事親絕意進取訓課諸生勤懇如子弟嘗患從學者無力購書聞見不廣乃市經史子集數百卷貯之塾中縱使瀏覽由是多所造就門人入邑庠登鄉榜者不下數十人邑中百餘年來文教之盛無有能及之者所著有聯桂軒文集四卷詩集二卷

李庚字友白少貧嘗服賈南陽立意以忠信不欺爲本稍有贏餘卽去之好述古人忠孝廉節之事以敦勉其黨類曾立鄉學延請名師敬禮之以故老生宿儒多樂與之往來其課子最嚴子澗源能承父志攻苦讀書名譽斐然道光元年歲

河內縣志

先賢傳下
卷二十六

四十一

貢生

任正卿紫陵鎮人少孤事母至孝家雖貧甘旨不少缺母有疾親奉湯藥晝夜不離左右母顏稍不悅卽拜跪負杖請罪必俟顏解而後起好施與嘗出人於萬死之中而不言其德有以紛難告者必爲排解各得其意故一鄉之中無獄訟者五十餘載五十無子禱於懸谷山生一子東華縣學生論曰議者以爲太行之山縣互數千里而河內居其首其雄奇偉異之氣蔚爲人文必有以異乎他者譬之榘楠豫章千尋之材不可生於培塿也然培塿則不生榘楠豫章而謂崇岡峻嶺遂無榘楠之材者非也故古之用人者或以德舉或以言揚無所不達而縣自昔爲賢豪淵藪如趙子蔡茂之經

術皇家之博覽山公之事業穆負李商隱之文章許衡何瑋
之理學此其章章尤著者也皆千尋之材也夫材無大小惟
適於時與用耳語曰千世而一聖百世而一賢是猶旦暮遇
之也之數人者雖在萬里之外千世之遠猶將聞而興起者
也況生其鄉而近其居被其澤而習其教者乎故近世以來
才德之士日出而不窮今所錄尤多信乎皆其材之美者也
繼此者其尚可勝數乎蓋跂而望之矣